

# Ilinniarnertuunngorniarneq pillugu Inatsisartut inatsisaat pillugu Namminersorlutik Oqartussat nalunaarutaat

Matumuuna Ilinniarnertuunngorniartarneq pillugu Inatsisartut inatsisaat nr. 13, 22. november 2011-meersoq, Inatsisartut inatsisaat nr. 4, 30. maj 2014-meersumi, Inatsisartut inatsisaat nr. 31, 9. december 2015-meersumi aammalu Inatsisartut inatsisaat nr. 16, 27. november 2020-meersumi allannguutitalinni nalunaarutigineqarpoq.

## Kapitali 1

### *Ilinniarnernerup siunertaa*

§ 1. Ilinniarnertuunngorniarnarluni ilinniagaq tassaavoq ilinniagaqalernissamut piareersaataasumik aamma nalinginnaasumik peroriartuutaasumik ilinniagaq. Ilinniagaq saaffginnippoq inunnut ilisimasaqarnermik, itisilerinermik, ungavarluni isiginneriaaseqarnermik takorluuisinnaanermillu soqutigisaqartunut, annermillu annertusisamik ilinniagaqarnissaq siunertaralugu. Ilinniagaq ataasiuvoq nunamilu piumasaqaataasut malillugit soraarummeernermik inaarneqassalluni (ilinniarnertuutut soraarummeerneq).

*Imm. 2.* Ilinniarnertuutut soraarummeerneq Kalaallit Nunaanni, Danmarkimi nunanilu allani annertusisamik ilinnialissutaasinnaavoq tamanna pillugu malittarisassat aalajangersarneqartut naapertorlugit.

*Imm. 3.* Ilinniarnertuunngorniarnarluni ingerlatsinerit immikkut ittut, Kalaallit Nunaanni Danmarkimilu ingerlaqqiffiusumik ilinniakkani sivikinnerusuni akunnattumillu sivilissusilinni ilinnialissutaasinnaasut pillugit Naalakkersuisut malittarisassanik aalajangersaasinnaapput, tamanna pillugu malittarisassat aalajangersarneqartut naapertorlugit.

*Imm. 4.* Ilinniartut ilinniarnertuunngorniarnarluni ilinniakkamik naammassisaqartut, kingusinnerusukku ingerlaqqiffiusumik ilinniakkamik aalajangersimasumik aallartinnissaannut naammassinissaannullu naammattumik piginnaasaqalernissaat siunertaralugu ilassutaasumik ilinniartitsinerit pilersinneqarsinnaapput. Naalakkersuisut ilinniarnertuunngorniarnarfimmi ilassutaasumik ilinniartitsinerit pillugit erseqqinnerusunik malittarisassaliussapput, ilinniarnertuunngorniarnarfimmi ataasiakkaani pikkorissarnerit pineqartut inissinnissaat ilanngullugu.

*Imm. 5.* Ilinniarnertuunngorniarnarfimmi ilinniartitsissutit ataasiakkaat ilinniartitsissutigineqarnissaat neqeroorutigineqarsinnaavoq.

*Imm. 6.* Ilinniarnertuunngorniarnarfimmi ilinniartitsissutini ataasiakkaani ilinniartitsineq pillugu

Naalakkersuisut malittarisassiorsinnaapput, tassunga ilanngullugit neqerooruteqartarnek neqerooruteqarsinnaanerlu.

**§ 1a.** Ilinnialernissamut piareersarluni pikkorissarnernik Kalaallit Nunaanni sivikitsumik akunnattumillu sivilissusilimmik ingerlaqqilluni ilinniarnernut isissutaasinnaasunik Naalakkersuisut pilersitsisinnaapput.

*Imm. 2.* Ilinnialernissamut piareersarluni pikkorissarnerit pillugit Naalakkersuisut malittarisassiorsinnaapput, tassunga ilanngullugit neqerooruteqartarnek, inissanik aqutsineq, ilinnialersinnaaneq ilinniarnermillu aallartitsineq, aqqissuussaaneq imarisaalu, nalilersuisarneq uppersaasiornarlu, takkuttussaataaneq peqataavinnerlu il.il., tapersiilluni ingerlatat aningaasalersuinerlu aamma peqataasut akiliutaat.

**§ 2.** Ilinniarnerup ilinniagaqalernissamut piareersaataanerata siunertaraa ilinniartut annertusisamik ilinniagaqalernissamut piareersarnissaat, tamatumunnga ilanngullugit ilinniakkap ilisimasariaqartutigit atitussusia itisileriffiunerlu aamma atuartitsissutit imminnut ataqatigiinneri aqqutigalugit ilisimasaqalerlutillu piginnaasaqalernissaat.

*Imm. 2.* Ilinniartut ilinniarnerup ilikkagassatigit aamma perorsaanikkut inerikkiartornera aqqutigalugu, ilikkagassatigit paasisaqarneq ilinnialernissamullu piginnaasaqarneq inerisassavaat. Suleriaatsit assigiinngitsut atornissaat aamma ilinniartut avatangiiseqarluni sulisinnaaneq ilikkassavaat, nammineersinnaanermik, suleqatiginnissinnaanermik ilisimasanillu ujarlersinnaanermik piginnaasaqarnissamik piumasaqaatit qitiutinneqarfianni.

**§ 3.** Ilinniagaq peroriartuutaasussanik ilaqqartinneqassaaq, ilinniartut inuttut oqartussaalernissaannik inerisaanissaq pingaartillugu. Taamaammat ilinniartut avatangiiserisaminnut: inoqatiminnut, pinngortitamut inuiaqatigiinnullu, kiisalu ineriatornerminnut eqqarsaatigilluakkamik akisussaasumillu pissuseqarfiginnissinnaanissaq ilinniassavaat. Aammattaaq ilinniakkap ilinniartut pilersitsisinnaanerata nassaarniarsinnaanerallu aamma isummersorsinnaassusiat inerisassavai.

*Imm. 2.* Ilinniarnerup ilinniartut ilusiligaanerisa ataatsimut ilinniartut inuiaqatigiinni kiffaanngissuseqartuni tamallu oqartussaaqataanerata naapertorlugu aqutaasuni aalajangeeqataanissamut, akisussaaqataanissamut, pisinnaatitaaffeqarnermut pisussaataaffinnullu piareersassavai. Taamaammat ilinniartitsinerup ilinniarnertuunngorniarfullu ulluinnarni inuunerisaata tamarmi tunngavigisariaqarpai anersaakkut kiffaanngissuseqarneq, naligiissuseq demokratiilu. Tamatumuunakkut ilinniartut inuiaqatigiinni demokratiskiusuni peqataalluarnissamut piginnaaneqalersinneqassapput aamma inuttut kisimiilluni ataatsimoorlunilu ineriatornermut allannguinerimullu periarfissanik paasinnissallutik, kiisalu eqqaamiorisani nunarsuarlu tamakkerlugu isiginneriaaseqarnermik paasinnissallutik.

*Imm. 3.* Ilinniartut ilinniarnertik aqqutigalugu Kalaallit Nunaata oqaluttuarisaanikkut, kulturikkut, inoqatigiissutsikkut, teknikkikkut aningaasaqarnikkullu ineriartornera paasisaqarfigalugulu ilisimasaqarfigilissavaat.

## Kapitali 2

*Neqerooruteqarneq, inissanik aqutsineq, ilinniartunngorsinnaaneq ilinniarnertuunngortitsinerlu*

## *Neqerooruteqarneq inissanillu aqutsineq*

§ 4. Ilinniarnertuunngorniarniluni ilinniagaq ilinniarni siunertamut Naalakkersuisunit pilersinneqartuni imaluunniit akuerineqartuni neqeroorutigineqassaaq. Ilinniarniit ilinniarnertuunngorniarniluni ilinniakkamik neqeroortussatut pilersinneqartut inatsimmi matumani taaneqarput ilinniarnertuunngorniarni. Ilinniarniit ilinniarnertuunngorniarniluni ilinniakkamik neqeroornissamut akuerisaasut inatsimmi matumani taaneqarput ilinniarniit akuerisaasut. Ilinniarnertuunngorniarniit aamma ilinniarniit akuerisaasut ataatsimut inatsimmi matumani taaneqarput ilinniarnertuunngorniarniit.

§ 5. Naalakkersuisut ilinniarnertuunngorniarnermut ilinniartunullu inissiaqarnikkut inissat ima amerlatigisut qularnaassavaat, qinnuteqartut § 8, imm. 1 aamma 2 naapertorlugit ilinniartunngornissamut piumasaqaatinik eqquutsisut tamarmik ilinniartunngorsinnaatillugillu ilinniakkaminnik naammassinnissinnaatillugit. Aammattaaq Naalakkersuisut anguniassavaat ilinniarnertuunngorniarniit ilinniartunullu inissat ima amerlatiginissat, qinnuteqartut ilinniartunngorniarniluni misilitsinnermi angusisut tamarmik, tak. § 9, imm. 1, aamma qinnuteqartut immikkut akuerisaallutik ilinniartunngortinneqarumasut, ilinniartunngortinneqarsinnaallutik ilinniarnertuunngorniarniluni ilinniagaq naammassisinnaallugu.

*Imm. 2.* Naalakkersuisut ilinniarnertuunngorniarnifimmu ataatsimut amerlanernulluunniit naleqqiullugu inissanik killiliisinnaapput inissat tamarmiusut siunertamut naapertuuttumik atorineqarnissat siunertaralugu.

§ 6. Ilinniarnertuunngorniarniluni ilinniakkami ilinniartitsineq klassinut holdinullu agguassilluni aqqissugaassaaq.

*Imm. 2.* Naalakkersuisut klassimi holdimilu ataatsimi ilinniartut amerlanerpaaffissat pillugu malittarisassanik aalajangersaassapput, taamatullu klassiortoqassappat holdiortoqarluniluunniit ilinniartut amerlassusissat aalajangersaaffigissallugu.

## *Ilinniartunngorsinnaaneq aamma ilinniartunngortitsineq*

§ 7. Ilinniarnertuunngorniarniluni ilinniagaq ammavoq kikkunnut tamanut, piffissap qinnuteqarfiup nalaani Kalaallit Nunaanni najugaqartunut, taammaattoq tak. imm. 2 aamma 3.

*Imm. 2.* Qinnuteqartut siusinnerusukku Kalaallit Nunaanni najugaqareersimasut, ilinniarnertuunngorniarniluni ilinniakkamut qinnuteqarnermut naleqqiullugu Kalaallit Nunaanni najugaqavissutut isigineqassapput, Kalaallit Nunaata avataaniinnerat Kalaallit Nunaanni oqartussaasut peqataaffigisaannik isumagineqarnermik imaluunniit ilinniarnermik peqquteqarpat.

*Imm. 3.* Ilinniarnertuunngorniarniluni ilinniagaq qinnuteqartunut Kalaallit Nunaanni najugaqavissuunngitsunut ammavoq, taakku nunat tamat akornanni isumaqatigiissutaasut, Kalaallit Nunaanni atuuttut, naapertorlugit Kalaallit Nunaannit qinnuteqartut assigalugit ilinniartunngorsinnaatitaappata.

§ 8. Qinnuteqartut ilinniarnertuunngorniarnifimmi ilinnialernissamut naleqqiullugu ukiut kingulliit marluk ingerlaneranni meeqqat atuarfianni naammassisut imaluunniit meeqqat atuarfianni atuartitsinnermut

nalinginnaasumik piumasaqaataasunut nallersuussinnaasumik atuartinneqarsimasut, ilinniarnertuunngorniartutik ilinnialersinnaapput, qinnuteqartumit makku anguneqarsimappata:

- 1) Greenlandic Grading System-skala naapertorlugu minnerpaamik karakteri E aalajangersimasumik qulequtsiilluni suliassami anguneqarsimappat,
- 2) Greenlandic Grading System-skala naapertorlugu minnerpaamik karakteri E inaarutaasumik pinngitsoorani misilitsiffusussani tamani anguneqarsimappat aamma
- 3) Greenlandic Grading System-skala naapertorlugu 10. klassimi inaarutaasumik angusimasanut karakterini tamani minnerpaamik karakteri E anguneqarsimappat.

*Imm. 2.* Rektori imm. 1-imi piumasaqaatinik sanioqqutitsinissamut akuersisinnaavoq, qinnuteqartup misilitsinnerit imaluunniit killiffimmi karakterit ikittunnguit ilaanni E ataassimappagu, rektorillu nalilerpagu qinnuteqartup ataatsimut piginnaasai ilinniarnertuunngorniartuni ilinniakkap naammassinissanut naammattut.

*Imm. 3.* Naalakkersuisut qinnuteqartup imm. 1-imi piumasaqaatinut naleqqiullugu ilinniakkatigut pisinnaasaasa nalilernissaat siunertaralugu, karakterilersueriaatsit Greenlandic Grading System-skalamit allaaneruset sanilliinneqarsinnaanngorlugit naatsorsornissaat pillugit malittarisassanik aalajangersaasinnaapput.

*Imm. 4.* Naalakkersuisut imm. 1-imi piumasaqaatit qinnuteqartunut nunanit allaneersunut atatillugu sanioqqunneqarnissaat pillugu malittarisassanik aalajangersaassapput.

**§ 9.** Qinnuteqartut § 8, imm. 1 imaluunniit 2 naapertorlugu ilinniartussatut tiguneqanngitsut Naalakkersuisunit neqeroorfigineqassapput nalilersorneqarlutik tigusaanissamut misilitsillutik. Misilitsinnerup siunertaraa, qinnuteqartup ilinniartitsinermik malinnaanissamut ilinniakkallu naammassinissanut naammattumik ilinniakkatigut ilisimasaqassutsimik takutitsinissaminut periarfissinnissaa.

*Imm. 2.* Inissaq pissutigalugu qinnuteqartut ilinniartunngorniartuni misilitsinnermi angusisut inissaqartinnginneri peqqutigalugit tiguneqarsinnaanngippata, rektorip aalajangissavaa qinnuteqartut kikkut ilinniartunngortinneqassanersut. Rektorip taamatut aalajangiinnermini qinnuteqartup ilinniarnertuunngorniartuni ilinniakkamik naammassinninnissamut periarfissai ataatsimoortumik nalilersussavai. Qinnuteqartut ilinniarnertuunngorniartummi ilinniartunngortinneqanngitsut, inissaqassuseq apeqqutaatillugu ilinniarnertuunngorniartummi allami ilinnialernissaannik utaqqisunulluunniit allatsinnissaminut neqeroorfigineqassapput.

**§ 10.** Ilinniartuq semesteri siullesq, tak. § 15, naammassereerlugulu, rektori isumaqatigisinnarlugu ukiut 2 angullugit ilinniarunnaarallartoq, semesterit aappaasa aallartinneranni ilinniarnertuunngorniarnini semesterimi tassani nangissinnaavaa, ilinniarnertuunngorniartummi ilinniartup ilinniarfigeriigaani imaluunniit ilinniarnertuunngorniartummi allami.

*Imm. 2.* Ilinniartup 1. G imaluunniit 2. G naammassereerlugit rektori isumaqatigisinnarlugu ukiut marluk angullugit ilinniakkaminik unitsitsigallartup, 2. G-p imaluunniit 3 G-p aallartinnerani ilinniarnertuunngorniarnini nangissinnaavaa ilinniarnertuunngorniartummi ilinniartup ilinniarfigeriigaani imaluunniit ilinniarnertuunngorniartummi allami.

**§ 11.** Qinnuteqartut ilinniarsiit aallartikkusutaminnik kissaatimi tullerriaarneri pingaarnerniit normulerlugit allassavaat.

*Imm. 2.* Qinnuteqartut ilinniarnertuunngorniarfimmi kommunimi qinnuteqarnermik nalaani aalajangersimasumik najugaqarfigisaminniittumi (kommuni angerlarsimaffik) ilinniartunngussapput imaluunniit ilinniarnertuunngorniarfimmi sammivik kissaatigisaminnik neqeroorutilimmi ilinniartunngortinneqassapput kommunip angerlarsimaffiup neqeroorutaaniinngipput ilinniarnertuunngorniarfimmi allami, taamaattoq tak. imm. 3-5.

*Imm. 3.* Naalakkersuisut aalajangersinnaavaat qinnuteqartoq ilinniarnertuunngorniarfimmi imm. 2-mi, pineqartuunngitsumi ilinniarnertuunngorniarfittut aallartissinnaasoq, inissaqarnikkut imaluunniit suliamut atatillugu inuttulluunniit pissutsit immikkut ittut tamanna pisariaqartilerpassuk.

*Imm. 4.* Ilinniarnertuunngorniarfimmi aalajangersimasumi ilinniakkatut sammivimmut aalajangersimasumut ilinniarsiup inissaqartitaaniit amerlanerulaartunik qinnuteqartoqarpat, Naalakkersuisut killilimmik amerlanerusunik ilinniartunngortitsisinnaaneq akuersissutigisinnaavaat. Ilinniarnertuunngorniarfimmi aalajangersimasumi ilinniakkatut sammivimmut aalajangersimasumut ilinniarsiup inissaqartitaanit amerlaneroqisunik qinnuteqartoqarpat, rektorip qinnuteqartut pisinnaasaannik ilinnialerumallutillu pissutigisaannik ataatsimoortumik nalileereernermigut aalajangissavaa, qinnuteqartut kikkut ilinniartunngortinneqassanersut. Qinnuteqartut ilinniartunngortinneqanngitsut pingaarnerniit tullerriaarnerinni tulluutsitartik naapertorlugu ilinniartunngortinneqassapput, malittarisassat maani nalunaarsorneqartut naapertorlugit.

*Imm. 5.* Naalakkersuisut qinnuteqartut illoqarfinnit, nunaqarfinnit imaluunniit sumiiffinnit aalajangersimasumik killilerneqarsimasuneersut ilinniarnertuunngorniarfimit tiguneqarnissaat eqqarsaatigalugu kommunimi allami angerlarsimaffeqartutut isigineqarsinnaanerat pillugit malittarisassanik aalajangersaasinnaapput.

**§ 12.** Ilinniartut illoqarfimmi ilinniarnertuunngorniarfimmik avataani najugaqartut, ilinniartunut inissiani assigisaanniluunniit inissaqarnissamik neqeroorfigineqassapput.

*Imm. 2.* Ilinniarnertuunngorniarfiup ilinniartut ataasiakkaat ilinniartunut inissiani assigisaanniluunniit atugarissaassusiat nakkutigissavaa.

**§ 13.** Ilinniartut ilinniartunut inissiani assigisaanniluunniit najugaqartut nerisaqarnissamik imaluunniit nerisaqartitaanikkut aaqqissuussinermik neqeroorfigineqassapput.

*Imm. 2.* Ineqarnermut assigisaanullu, nerisaqarnermut imaluunniit nerisaqartitaanikkut aaqqissuussinermut akiliutissat pillugit malittarisassanik Naalakkersuisut aalajangersaassapput.

**§ 14.** Naalakkersuisut ilinniartut ilinniarnertuunngorniarfinni ilinnialersinnaanerat pillugu malittarisassanik aalajangersaasinnaapput, tamatumunnga ilanngullugit inissat pillugit aalajangersakkat, qinnuteqarnermi periutsit, qinnuteqarnissamut piffissaliussat, agguaassinermi periutsit, ilinniartunut inissiat assigisaallu, ilinniartut ilinniartunut inissiani assigisaannilu najugaqartut nakkutiginerat, ilinniartunut inissiani assigisaannilu nerisaqarneq nerisaqartitaanikkullu aaqqissuussinerit, ilinnialernissamut misilitsinnerit, ilinniarnertuunngorniarnerup aallarteqqinnera unitsinneraluunniit, immikkut aaqqissuussamik ingerlatsinernut immikkullu ilusilikkamik ilinniartitsinernut ilinniartunngortarnerit aamma ilinniartunngortitsinermi sulianik naammagittaalliorneq.

### Kapitali 3

#### *Ilinniakkap aaqqissugaanera imarisaalu*

#### *Ilusaa, atuartitsissutit piffissarlu ilinniartitsivik*

**§ 15.** Ilinniagaq aaqqissugaassaaq semesteri siulleg, ilinniartunut tamanit ataatsimoorunneqartutut, tamatumalu kingorna ilinniarnermi immikkut sammiveqarluni ingerlatsinertut, ilinniartunit ataasiakkaanit ingerlatsinernit ilinniarnertuunngorniarniit neqeroorutigalugillu pilersitaasa akornannit toqqarneqartumik, tak. § 29. Immikkut sammiveqarluni ilinniagaq tassaavoq ilinniakkap semesteriisa aappaanniit arfernannut.

*Imm. 2.* Semesterit 1, 3 aamma 5 ukiup ilinniarfusup aallartinneraniit 31. decemberimut ingerlasarput. Semesterit 2, 4 aamma 6 1. januarimiit ukiup ilinniarfusup naaneranut ingerlasarput.

*Imm. 3.* Semester 1 aamma 2 taaneqartarpoq 1. G, semesteri 3 aamma 4 taaneqartarpoq 2. G semesterillu 5 aamma 6 taaneqartarlutik 3. G.

*Imm. 4.* Ilinniakkami ilinniartitsissutit tassaapput ilinniarnertuunngorniarnifimmi ilinniartitsissutit killiffik C-mi, B-mi A-milu inissisimasut, A qaffasinnerisaalluni.

**§ 16.** Piffissaq ilinniartut atuarfissaat aalajangerneqassaaq ukiumoortumik tiimiliussat 60 minutsikkaartut tunngavigalugit.

*Imm. 2.* Ukiuni pingasuni ilinniakkap ataatsimut katillugit tiimit 2225-2725-ussapput ilinniartullu ilinniakkaminik sammivimmik immikkullu toqqagassanik toqqaasimanera apeqqutaalluni ukiuni marlunni ilinniarnerni tiimit 1500-1825-ussallutik.

*Imm. 3.* Ilinniartut tiimii sapinngisamik ukiumi atuarfusumi sapaatip-akunnerinut aamma sapaatip-akunnerisa atuarfusut ulluinut naligiimmik agguanneqassapput.

*Imm. 4.* Imm. 2-mi taaneqartunit sivilunermik sivikinnermilluunniit ilinniarfusuni atuartitsiviusut tiimit qassiussanersut malittarisassanik Naalakkersuisut aalajangersaasinnaapput.

**§ 17.** Ukioq ilinniarfusooq aallartittarpoq 1. august 180-i 220-nut ulloqarluni, taakku sapaatip-akunnerata ulluinut siullernut 5-inut imaluunniit ulluinnarnut 6-inut tamanut (sapaatip-akunnera ilinniartitsiffusooq) agguassimassapput.

*Imm. 2.* Pikkorissarnermut immikkut aaqqissuussanut, ilinniartitsilluni ingerlatsinernut ilinniartitsissutinik arlariissitsiffusunut, aalajangersimasumik qulequtsiilluni suliniuteqarluniluunniit ingerlatsinernut atatillugu ilinniarnertuunngorniarniarfup sapaatip-akunneranut ulluni 5-ini ilinniartitsisartup sapaatip-akunnerani ullut arfernat ullutut ilinniartitsiffittut ilanngussinnaavaa. Taama pisoqassappat, ilinniarnertuunngorniarniarfup ukiup ilinniartitsiffusup aallartinnissaa sioqqullugu tamanna pillugu pilersaarut suliaralugulu tamanut saqqummiutissavaa.

*Imm. 3.* Ilinniartitsineq minnerpaamik sapaatip-akunnerisa 36-t annerpaamillu sapaatip-akunnerisa 40-t ingerlaneranni naammassineqassaaq.

*Imm. 4.* Ilinniarnertuunngorniarniit ukiup ilinniartitsiffusup aallartinnerani sulinngiffeqarnissanut pilersaarutit suliarisassavaat tamanullu saqqummiullugit.

*Imm. 5.* Naalakkersuisut sulingiffeqarnissamut pilersaarutit sinaakkutissaannik aalajangersaasinnaapput.

#### *Semesteri siulleg*

**§ 18.** Semesteri siulleg tunngaviusumik atuarfup nanginneratut aqqissuuneqassaaq. Semesteri siulleg ilinniartut ilinniagassanut tunngatillugu ilisimasaqalersissavai paasisaqartillugillu aamma ilinniarnertuunngorniarfimmi suleriaatsinik paasisaqartillugit, ilinniartorlu ilinniakkami sammivissaanik toqqaanissaanut naammassinninnissaanullu tunngavississallugu, kiisalu ilinniartup nalinginnaasumik peroriartornissaanut tunngaviussalluni.

**§ 19.** (Atorunnaarsinneqarpoq).

**§ 20.** Semesterimi siulliup imarivai ilinniartitsissutit imminnut ataqatigiittussat.

*Imm. 2.* Naalakkersuisut semesterimi siullermi pinngitsoorani sorliit atuartitsissutigineqartussat pillugit malittarisassanik aalajangersaasinnaapput.

**§ 21.** Naalakkersuisut ilinniartitsissutit ataasiakkaat killiffinni assigiinngitsuni anguniagaat, imarisaat annertussusaallu pillugit malittarisassanik aalajangersaassapput (ilikkagassatut pilersaarutit).

#### *Ilinniakkatigut sammiviit*

**§ 22.** Ilinniakkatigut sammivinnik ingerlatsinerup ilinniartut ilinniakkamut atatillugu itisilerinissamut ilinniakkallu nukittorsarnissaanut periarfississavai.

**§ 23.** (Atorunnaarsinneqarpoq).

**§ 24.** Ilinniakkatigut sammivinnik ingerlatsinerup ilaapput ilinniartitsissutit pinngitsoorani peqataaffigisassat imminnut ataqatigiissut aamma ilinniartitsissutit ilinniartup nammineq toqqagai.

*Imm. 2.* Ilinniakkatigut sammivinnik ingerlatsinerup naammassinerani ilinniartut tamarmik minnerpaamik ilinniartitsissutit marluk killiffik A-miittut ilinniarsimassavaat.

**§ 25.** Ilinniakkatigut sammivinni tamani ilinniartitsissutit makku pinngitsoorani ilaatinneqassapput:

- 1) Kalaallit oqaasii, killiffik A-mi.
- 2) Danskit oqaasii, killiffik A-mi.
- 3) Tuluit oqaasii, minnerpaamik killiffik C-mi.
- 4) Matematikki, minnerpaamik killiffik C-mi.
- 5) Inuiaqatigiilerineq, minnerpaamik killiffik C-mi.
- 6) Namminerisamik ilinniarnermi suliaasaq.

*Imm. 2.* Ilinniakkatut sammivinni ataasiakkaani aammattaaq ilinniartitsissutit pinngitsoorani peqataaffigisassat marluk ilaapput. Ilinniartitsissutit killifillu suunerannut ilinniakkatut sammiviit ataasiakkaat apeqqutaapput.

**§ 26.** Ilinniarnertuunngorniarniit ilinniartitsissutit toqqarneqarsinnaasut arlaqartut C-mik, B-mik A-millu killiffeqartut, ilinniakkatut sammiviit akimorlugit toqqarneqarsinnaasut neqeroorutigissavaat. Ilinniartitsissutit toqqarneqarsinnaasut ilinniartitsissutit ataatsimoortut iluanneersuussapput, ilinniartitsissutit ataatsimoortut teknikkimut-pingortitamik ilisimatusarnermut, inuiaqatigiilerinermut, humanioramut, niuernermet eqqumiitsuliornermullu tunngasutigut ilinniartitsissutit ataatsimoortut assigiinngitsut akornanneersuullutik.

*Imm. 2.* Tuluit oqaasii killiffik B-mi aamma A-mi ilinniarnertuunngorniarniit tamani toqqagassat neqeroorutaassapput. Rektori ilinniartitsissutit toqqagassat allat neqeroorutiginissaat pillugu aalajangiisassaaq, taamaattoq tak. imm. 3.

*Imm. 3.* Naalakkersuisut ilinniarnertuunngorniarniit ilinniartitsissutit toqqagassanik neqeroornissaat pilersitsinissaallu aamma ilinniartitsissutit killiffillu suut ilinniarnertuunngorniarniit ilinniartitsissutit toqqagassanik neqeroorutaannut ilaasinaanersut pillugit malittarisassanik aalajangersaasinnaapput.

**§ 27.** Naalakkersuisut ilinniartitsissutit ataasiakkaat killiffinni assigiinngitsuni anguniagaat, imarisassat annertussusissaallu pillugit malittarisassanik aalajangersaassapput (ilikkagassatut pilersaarutit).

**§ 28.** (Atorunnaarsinneqarpoq).

**§ 29.** Ilinniarnertuunngorniarniit ukiut tamaasa aalajangertassavaat, ilinniakkatut sammiviit suut ilinniarnertuunngorniarniit ataasiakkaani neqeroorutiginiarneqarnersut, Naalakkersuisullu tamatumunnga piffissaliussaasut sioqqullugu pineqartoq pillugu Naalakkersuisunut nalunaartassallutik.

*Imm. 2.* Naalakkersuisut ilinniarnertuunngorniarniit ilinniakkatut sammivimmik neqerooruteqarnissaanik itigartissinnaavaa, tamanna immikkut ittunik peqquteqarpat.

*Imm. 3.* Naalakkersuisut ilinniarnertuunngorniarniit ilinniakkatut sammivinnik pilersitsinissamut sinaakkutissaat pillugit malittarisassanik aalajangersaasinnaapput, tamatumunnga ilanngullugu ilinniarnertuunngorniarniit ataatsimoorussamik ilinniakkatut sammivinnik neqerooruteqartarnissamut pisussaaffeqarnerat (ilinniakkatut sammiviit pinngitsoorneqartussaangitsut).

#### *Nammineq piumassutsimik ilinniarneq*

**§ 30.** Ilinniarnertuunngorniarniit ilinniartut namminnek piumassutsiminnik peqataaffigisinnaasaannik ilinniartitsinernik neqerooruteqarsinnaapput. Ilinniartitsineq ukioqatigiiaat, klassit, holdit ilinniartitsissutillu akimorlugit neqeroorutigineqarsinnaavoq. Qulequttat nutaat ilinniartitsinermut ilaasut, ilinniartitsissummi pineqartumi misilitsinnernut ilaatinneqarsinnaanngilat.

*Imm. 2.* Rektorip ilinniartut neqeroorfigisinnaavai ilinniarnertuunngorniarniit atortui ilinniagassanik ilinniarnermut assigisaanulluunniit atorineqarsinnaatillugit, tassuunakkut ilinnianermi avatangiiseqarneq ilinniartullu tamarmik ilinniakkamikkut pissarsilluarnissamut toqqammaviat nukittorsarumallugit.

*Ilinniartitsinermi oqaatsit aamma oqaatsinik ilinniartitsinermi tunngaviit*



§ 31. Ilinniartitsinermi oqaatsit tassaapput kalaallit danskillu oqaasii. Aammattaaq tuluit allamiulluunnit oqaasii allat ilinniartitsinermi oqaatsit atorneqarsinnaapput.

*Imm. 2.* Ilinniartitsinermi oqaasilerinermi oqariaatsit ataatsimoorussat atorneqassapput.

§ 32. Kalaallit oqaasiisa killiffik A-mi ilitsoqqussaralugu oqaatsit ilinniartitsissutiginerat eqqaassanngikkaanni, ilinniartitsissutini tamani ilinniartitsinermi allamiut oqaasiinik ilinniartitseriaaseq ilinniartut oqaatsitigut ineriartornerannik ilinniagassatigullu pissarsinerannik nukittorsaasoq tunngavigineqassaaq.

*Suleriaatsit aamma perorsaanikkut tunngaviit*

§ 33. Ilinniarneq tamaat ilinniartitsissutinilu tamani ilinniagaq ingerlanneqassaaq atuinissamut sammisut atuagarsornerlu pingartillugit.

*Imm. 2.* IT ilinniartitsissutini tamani ilinniartitsinermit ilaassaaq.

*Imm. 3.* Ilinniarneq tamaat ilinniarnermi periutsinik sungiusarnej ingerlaavartumik ilinniartitsinermit ilaatinneqassaaq.

§ 34. Ilinniartitsinerup ilaa ilinniarnermi takusassarsiornerut, paasisassarsiorluni angalanertut il.il. aaqqissuunneqarsinnaavoq.

§ 35. Ilinniartitsineq taassumaluunniit ilaa ungasianiit ilinniartitsinerut aaqqissuunneqarsinnaavoq.

*Imm. 2.* Ilinniartuq nalunaareeraluarluni ungasianiit ilinniartitsinermit peqataanngippat, ilinniartup ilinniarnertuunngorniarfiata pisussaaffigaa, sapinngisamik ilinniartup ilinniakkami nalinginnaasumi kinguaattooruteqarani ilinniarnertuunngorniarfimmil ilinniartup ilinniartuuffigeriigaani ilinniarnertuunngorniarfimmiluunniit allami ingerlaqqinnissaata isumaginissaa.

*Imm. 3.* Naalakkersuisut ungasianiit ilinniartitsineq pillugu malittarisassanik erseqinnerusunik aalajangersaasinnaapput.

§ 36. Ilinniarnerp ilaa nunani allani ilinniarfimmi ingerlanneqarsinnaavoq, ilinniartunit immikkut aaqqissuussinermit Naalakkersuisunit akuerineqartumut nalunaaqqasunit, tamanna siumoortumik pilersaarusiugaappat. Ilinniarneq nunami allami semesterimi ataatsimi imaluunniit Naalakkersuisunit immikkut akuerineqareernikkut ukiut marluk tikillugit pisinnaavoq. Semesterimi siullermi ilinniarneq nunani allani pisinnaanngilaq.

*Imm. 2.* Ilinniartuq nalunaareeraluarluni nunami allami ilinniarfimmi ilinniarnermut peqataanngippat, ilinniarnertuunngorniarfiata pisussaaffigaa, sapinngisamik ilinniartup ilinniakkami nalinginnaasumi kinguaattooruteqarani ilinniarnertuunngorniarfimmil ilinniartup ilinniartuuffigeriigaani ilinniarnertuunngorniarfimmiluunniit allami ingerlaqqinnissaata isumaginissaa.

§ 37. Ilinniartitsineq ilinniarneq tamaat aaqqisugaassaaq ima,

- 1) ilinniartunut tamanut unaminartoqarluni sammisaqartitsiffulluni,
- 2) ilinniartunit tamanit ilinniartitsissutini tamani nikerassutsimik siuariartussutsimillu naapitaqarfiussalluni,

- 3) ilinniartunit tamani ilinniartitsissutini tamani ilinniakkamut atatillugu oqaatsinik pilersitsinermi siuariartussutisimik naapitaqarfussalluni aamma
- 4) ilinniagaq ataatsimut isigalugu ilinniartitsissutinilu ataasiakkaani anguniakkat anguneqassallutik.

#### *Ilinniartitsisooqatigiit*

**§ 38.** Klassini tamani semesterimi siullermi aamma ilinniakkatigut sammivinnik ingerlatsiffusuni ilinniartitsisooqatigiit rektorimit katiterneqassapput, taakku ilinniartitsisunik marlunnik amerlanernilluunniit inuttaqassapput, klassimilu ilikkariartornermi avatangiiserisanik toqqissisimanartunik ilinniartullu ataasiakkaat peqqissutut misigisimanerannik inerisaanissaq siunertaralugu, tassuunakkut ilinniagassanut sammineq inerisarneqaqqullugu ikerinnakkullu unittarnerit pinaveersaarneqaqqullugit.

*Imm. 2.* Ilinniartitsisooqatigiit suliassaraat klassimi kulturip klassimilu toqqissisimanerup pilersinnissaat, suliassat perorsaanikkut ilinniakkamullu tunngasutigut perorsaanikkut ikorfartuutaasut isumaginissaat aamma allaffissornikkut suliassat ilinniartitsisooqatigiit siunertaannut attuumassuteqartut isumaginissaat.

*Imm. 3.* Ilinniartitsisooqatigiit ilinniartitsisullu ilinniartitsisooqatigiinnut ilaasut klassip ilinniarnermut ilitersuisua suleqatigissavaat, aamma ikorfartuisoqartitsilluni aaqqissuussinerit pilersinnissaannut peqataassallutik.

*Imm. 4.* Rektorip ilinniartitsisooqatigiit ilinniartitsisooqatigiinnilu ilinniartitsisut ataasiakkaat ilinniartitsinerup pilersaarusiornernanut, ingerlanneranut, nalilerneranut inerisarneranullu naleqqiullugu sunik suliakkerneqarnissaat erseqqinnerusumik aalajangissavaa.

*Imm. 5.* Rektorip ilinniartitsisooqatigiit ilinniartitsisooqatigiinnilu ilinniartitsisut ataasiakkaat taakkununga ilaasut atuuffissaasa sivisussusissaa aalajangissavaa.

#### *Ikorfartuineq, ilitersuineq siunnersuinerlu*

**§ 39.** Ilinniarnertuunngorniartuup ilinniartut ataasiakkaarlugit ikorfartuinissamik, siunnersuinermik aamma ilinniakkatigut sammivimmik toqqaaniarneranni, ilinniartitsissutit toqqagassat toqqarniarneranni, ilinniakkap naammassinissaa pillugu aamma ilinniakkamik inuutissarsiummillu toqqaaniarneranni ilitersorneqarnissaannik neqeroorfigissavai. Suliassat tamakkiisumik ilaannakortumilluunniit piffissap ilinniartitsiffiup skemaqartup avataani isumagineqarsinnaapput.

*Imm. 2.* Rektorip qularnaassavaa piffissap ilinniartuup ilaatut ilinniakkatigut periutsitigullu ilinniartitsissutini ataasiakkaani aamma ilinniartitsissutit imminnut ataqatigiinnerat pillugu ilitersuisoqarnissaa. Rektori ilitersuinerup aaqqissugaanerata pilersaarusiorneralu aaqqissuunnissaat pillugit erseqqinnerusumik aalangiissaaq.

*Imm. 3.* Rektori minnerpaamik semesterimut ataasiarluni klassit ilinniartulluunniit ataasiakkaat pillugit pissutsit, klassimi ilinniartitsisui ilinniartitsisooqatigiillu peqatigalugit oqallisigissavai.

*Imm. 4.* Ilinniartut siunnersuinerlut ilitersuinernullu, imm. 1 aamma 2 naapertorlugit ingerlanneqartumut peqataasussaataapput.

*Imm. 5.* Naalakkersuisut ikorfartuineq, siunnersuineq ilitersuinerlu pillugit malittarisassanik aalangersaasinnaapput, tamatumunnga ilanngullugit ilitersuisunit pisinnaasatigut piumasaqaatit.

*Ingerlatsinerit immikkut aaqqissuussat*

**§ 40.** Rektorip ilinniartut qinnuteqareernerisigut ilinniarnernannik sivikillisaassinnaavai ilinniartitsissutinilu misilitsinnissamut peqataannginnissaat akuerisinnaallugu, ilinniarteq ilinnialinnginnermini ilinniartitsissut ilinniarnertuunngorniartarfiimmi taama qaffassissusilimmik qaffasinnerusumilluunniit killiffeqartumik naammassereersimappagu.

*Imm. 2.* Aammattaaq rektorip qinnuteqartoqareerneratigut ilinniarteq piffissamik ilinniarfianik sivikillisaassinnaavaa, ilinniartitsissutinik paarlaassineq ilanngullugu, ilinniarnernit imaluunniit misilitsinnermit ilinniarnernup aallartinnera sioqqullugu naammassereerneqarsimasumit ilinniarnerrulluunniit ilaa ingerlatereersimappagu, ingerlatsisimanera rektorip naliliinera naapertorlugu ilinniakkami ilinniarnernup ilaanut taarsiussinnaappat.

*Imm. 3.* Ilinniartunut imm. 1 imaluunniit 2 naapertorlugu sivikillisaanneqartunut ilinniarnertuunngorniartarfik immikkut aaqqissuussanik ingerlatsisinnaavoq, nalinginnaasumik ilinnianertuunngorniartarnermit sivikinnerusunik.

*Imm. 4.* Ilinniarteq sivikillisaanneqarnissaminik akuerineqarsimaguni, ilinniartitsissummi sivikillisaanneqarfimmi taarsigaani ilinniartitsinermit misilitsinnermulluunniit peqataanissaminik piumasaqaateqarsinnaanngilaq.

*Imm. 5.* Naalakkersuisut sivikillisaanneqartarnek pillugu malittarisassanik erseqqinnerusunik aalajangersaasinnaapput, tamatumunnga ilanngullugit ilinniartitsissutit suut sivikillisaaffigineqarsinnaanersut, qanorlu annertutigisumik ilinniartitsissutit sivikillisaaffigineqarsinnasut ataatsimoortumik soraarummeernermit ilaasinnaanersut.

**§ 41.** Naalakkersuisut ingerlatsinerit immikkut aaqqissuussat, inunnut ukiunik pingasunik sivikinnerusunik ilinniarnertuunngorniarnissamik kissaateqartunut saaffiginnittut pillugit malittarisassanik aalajangersaasinnaapput.

**§ 42.** Rektorip ilinniarnertuunngorniarneq sivitsorsinnaavaa ilinniartunut ilinniakkamikkut pissutsit, peruluutaasumik napparsimaneq innarluutilluunniit pissutigalugit ilinniartitsinermit nalinginnaasumik malinnaaniapiloortunut atatillugu.

*Imm. 2.* Ilinniartut napparsimanertik pissutigalugu piffissami sivilisunerusumi ilinniakkamut malinnaasinnaanngitsut, periarfissaqarnera naapertorlugu napparsimanerminni ilinniartinneqarnissaminik neqeroorfigineqassapput.

*Imm. 3.* Rektorip ilinniarteq innarluutilik timersornermik ilinniartitsinermit peqataannginnissaanik akuerisinnaavaa, innarluutaata ilinniartitsinermit peqataanissaa ajornakusoortippagu. Ilinniartitsissut toqqarneqarsinnaasoq sorleq ilinniartup paarlaallugu peqataaffigissaneraa rektorip ilinniarteq oqaloqatigisinnarlugu aalajangissavaa.

*Imm. 4.* Naalakkersuisut imm. 2-mi napparsimasunik ilinniartitsineq pillugu erseqqinnerusunik malittarisassalorsinnaapput, tamatumunnga ilanngullugu ilinniarnertuunngorniartarfiup ilinniartumut saaffiginnittussaataitanera aamma misilitsinnerit soraarummeernerillu naleqqussakkat, tak. imm. 1.

**§ 43.** Ilinniartut pisariaqartitsisut perorsaanikkut tapersiissutaasumik immikkut aaqqissuussinernik neqeroorfineqassapput.

*Imm. 2.* Perorsaanikkut tapersiissutaasumik immikkut aaqqissuussinerit ilinniartumut periarfissiissutigineqassapput, tamanna pillugu immikkut ilisimasallit oqaaseqareernerisa kingorna ilinniartup pisariaqartitaanik, pisariaqartitat pineqartut ikiorsiivigineqarsinnaanerannik periarfissanut sanilliussilluni, rektorip tigussaasumik nalileereerneratigut. Ingerlatsinerit ilinniartup ilinniartitsisuisalu oqaloqatigineqareernerisigut aallartissapput. Ilinniartoq sulii oqartussaasunik angajoqqaarpat ingerlatsineq aallartissaaq angajoqqaatut oqartussaassuseqartoq suleqatigalugu.

*Imm. 3.* Naalakkersuisut perorsaanikkut tapersiissutaasumik immikkut aaqqissuussinerit pillugit malittarisassanik aalajangersaasinnaapput.

## **Kapitali 4**

### *Naliliineq uppersaasiinerlu*

#### *Ingerlaavartumik naliliineq*

**§ 44.** Ilinniartut ataasiakkaat ilinniartinneqarnerminni pissarsiaat pillugit ingerlaavartumik nalilersuisoqassaaq. Naliliineri ilinniartup nammineq imminut nalilernerla ilaatinneqassaaq.

*Imm. 2.* Naliliinerup ilinniartoq nammineq siumukassusianik paasissutississavaa, tassuunakkut ilinniartup ilikkariartoqqinnera ineriikkartorneralu pillugit ilitsersuinissamut tunngavissiisoqaqqullugu, tamatumunnga ilanngullugit ilinniakkatut sammivimmik, ilinniartitsissutini ilinniartitsissutinillu toqqagassanik toqqaanissamut tunngasut. Aammattaaq naliliinerup tunngavississavaa ilinniartup ilinniartitsinermik ingerlanneqareertumik naammaginartumik pissarsisimaneranik rektorip naliliinissaa, tak. § 53.

*Imm. 3.* Naalakkersuisut ingerlaavartumik naliliisarneq, tamatumunnga ilanngullugu naammagittaalliorarneq, pillugit erseqqinnerusumik malittarisassaliussapput.

**§ 45.** Ilinniartup ilinniartitsinermik pissarsiaqarnera pillugu ilinniarnertuunngorniarfiup isumaanik angajoqqaatut oqartussaataasut akuttunngitsumik ilisimatinneqartassapput.

*Imm. 2.* Naalakkersuisut angajoqqaatut oqartussaataasut ilisimatinneqartarnissaat pillugu erseqqinnerusumik malittarisassaliorsinnaapput.

### *Inaarutaasumik naliliineq uppersaasiinerlu*

**§ 46.** Inaarutaasumik naliliineq pissaaq ataatsimoortumik naliliinertut (ilinniarnertuutut soraarummeerneq), tassungalu ilaassapput Naalakkersuisunit aalajangerneqartumik oqaluttariarsorluni allattariarsorlunilu misilitsinnerit arlaqartut aamma ilinniartut ataasiakkaarlutik ilinniarnerminni suliaat. Ilinniartitsissutini kalaallit aamma danskit oqaasiini allattariarsorluni misilitsittoqassaaq.

*Imm. 2.* Aammattaaq ilinniarnertuutut soraarummeertoqarsinnaavoq ilinniartitsissutini ataasiakkaani, ilinniartitsissutini pinngitsoorani peqataaffigisassani misilitsinnermi, ilinniartitsissutini toqqagassani pisariaqartunik amerlassusilinni aamma ilinniartut ataasiakkaarlutik ilinniarnerminni suliaanni karakterinik katiterinikkut. Tamanna pillugu Naalakkersuisut malittarisassanik erseqqinnerusumik

aalajangersaasinnaapput.

*Imm. 3.* Misilitsinnerit imm. 1-imi taaneqartut namminneerlutik ilinniartunit misilitsiffusinnaapput, tak. § 54, imm. 2. Naalakkersuisut namminneerlutik ilinniartut misilitsittarnerat pillugu malittarisassanik erseqqinnerusunik aalajangersaasinnaapput.

**§ 47.** Ilinniarnertuutut soraarummeernermut ilaasinnaapput ilinniartitsissutini tamani misilitsinnerit, taamaallaat ilinniartitsissutit timersorneq, nipilersorneq aamma assilissanik eqqumiitsuliorneq killiffik C-miittut pinnagit, kiisalu ilinniartitsissutit science ilinniarnermilu periutsit pinnagit. Misilitsinnerit ilinniartitsissutit arlariinngorlugit ingerlanneqarsinnaapput.

*Imm. 2.* Naalakkersuisut ukiut tamaasa aalajangertassavaat, qaqugukkut misilitsinnerit qitiusumiit suliaakkiissutitalit ingerlanneqartassanersut. Rektorip aalajangissavaa misilitsinnerit allat ilinniarnertuunngorniarninni ataasiakkaani qaqugukkut ingerlanneqassanersut, piffissaliussat ilinniartitaanermut Naalakkersuisoqarfiup aalajangiussaasa iluanni.

*Imm. 3.* Naalakkersuisut ukiut tamaasa aalajangertassavaat, ilinniartut ataasiakkaat ilinniartitsissutini sorlarni misilitsissanersut. Ukiut ilinniarniit tamaasa rektorip ilinniartunut ilisimatitsissutigissavaa, ilinniartitsissutini sorlarni misilitsittoqassanersaq.

**§ 48.** Misilitseriaaseq apeqqutaatinnagu ilinniartut ataasiakkaarlutik nalilerneqassapput.

**§ 49.** Rektorip misilitsinnerit isumagissavai aamma misilitsinnernut soraarummeernernullu uppernarsaatit suliarissallugit.

*Imm. 2.* Soraarummeerluni angusinerup kingorna ilinniartoq soraarummeersimanermut uppernarsaammik tunineqassaaq.

*Imm. 3.* Soraarummeersimanermut uppernarsaatip nalinginnaasumik imarissavai misilitsinnermi karakterit, ukiumut karakterit aamma ilinniartut ataasiakkaarlutik ilinniarnerminni suliaanni karakteri. Soraarummeernermut uppernarsaammi karakterit, assigiinngitsunik naleqartinneqarlutik, soraarummeernermi angusanut ilaasinnaapput.

*Imm. 4.* Ilinniartunut ilinniarnertuunngorniarnimmi atuartitsissutininik ilinniarnertuutut soraarummeeratik naammassisunut imaluunniit ilinniarnerminnik ikerinnakkut unitsitsisunut rektori uppernasaasiussaaq, tassanilu ilisimatitsissutigineqassapput ilinniartoq ilinniartitsinernut sorlernut peqataasimanersaq aamma ingerlaavartumik naliliinermi angusaasut, kiisalu paasissutissat naapertuuttut allat, ilinniartup ataatsimoortumik naliliinermut ilanngunneqartussatut kissaatigisai.

**§ 50.** Naalakkersuisut inaarutaasumik naliliineq uppernarsaasiinerlu pillugit malittarisassanik erseqinnerusunik aalajangersaassapput, tassunga ilanngullugit atuagassat annertussusiat, piumasaqaatit soraarummeerutissatullu pisassiissutit, misilitsinnerit, suliaakkiissutit, naliliineq, nalileeqaataaneq, karakterit taakkualu soraarummeernermi angusaasuni nalingat, soraarummeernermut uppernarsaatit, soraarummeernissamut nalunaarneq, soraarummernissamik pilersaarusionerq, napparsimasunik soraarummeersitsineq, naammagittaalliorneq il.il.

*Nalileeriaatsit ingerlaqqinnerlu*

**§ 51.** Ilinniartut ataasiakkaat ilinniakkamut tunngatillugu pisinnaasaat angusanut tunngatillugu karakterit, ilinniartuup iluani misilitsinnermi karakterit aamma oqaasiinnakkut allakkatigullu oqaaseqaatit atorlugit nalilerneqartassapput.

*Imm. 2.* Angusanut tunngatillugu karakterit tassaapput, ilinniartitsissummi pineqartumi ilinniakkatigut ilisimasassani anguniakkanik, ilikkagassatut pilersaarummi paasinninnermut periutsinullu tunngatillugu ilinniartut ataasiakkaat karakteriliinerup nalaani qanoq piviusunngortitsitiginerannik oqariartuutit.

*Imm. 3.* Ilinniartuup iluani misilitsinnermi karakterip oqariartuutigaa ilinniartut ataasiakkaat suliassiisummut naleqqiullugu ilinniakkatigut ilisimasassani anguniakkanik, paasinninnermut periutsinullu tunngatillugu qanoq piviusunngortitsitiginerat.

*Imm. 4.* Oqaasiinnakkut allakkatigullu oqaaseqaatit oqariartuutigaat ilinniartut ataasiakkaat suliassiisummut naleqqiullugu ilinniakkamili pineqartumi ilinniakkatigut ilisimasassani anguniakkanik, paasinninnermut periutsinullu tunngatillugu qanoq piviusunngortitsitiginerat.

*Imm. 5.* Naalakkersuisut nalileeriaatsit pillugit malittarisassanik erseqqinnerusunik aalajangersaasinnaapput.

**§ 52.** Suliassat suliniutillu anginerusut ilinniartut suleqataaffigisaat immikkoortillugit nalilerneqassapput.

**§ 53.** Rektorip ilinniartup 1.G-miit 2.G-mut imaluunniit 2.G-miit 3.G-mut nuunnissaa itigartitsissutigisinnaavaa, nalilerneqarpat ilinniartoq ataatsimut isigalugu ilinniartitsinermik ingerlanneqareersumik naammaginnartumik pissarsisimanngitsoq. Tamatumani pisariaqarpoq, kisiannili klassimut tullermut nuunnissamik itigartitsinnermut kisimi peqqutaasinnaanani, ilinniartup angusanut tunngatillugu semesterimi imaluunniit killiffimmini karakteriisa angusinissamut killigititaasunit appasinnerunissaat.

*Imm. 2.* Naalakkersuisut rektorip ilinniartup klassimut qaffasinnerusumut nuunnissaanik itingartitsisinnaanera pillugu malittarisassanik erseqqinnerusunik aalajangersaasinnaapput, tamatumunnga ilanngullugu ilinniartup ilinniartinneqaqqinnissanik sunik neqeroorfigineqassanersoq.

## Kapitali 5

*Pinngitsoorani takkuttussaaneq aamma suleqataalluarluni peqataanissaq il.il.*

**§ 54.** Ilinniartut pinngitsoorati takkuttussaataapput ilinniartitsinermullu suleqataalluarlutik peqataassallutik, taammaattoq tak. imm. 2.

*Imm. 2.* Ilinniartut ilinnialerumallutik qinnuteqarnerminnut atatillugu ilinniarnarullu ingerlanerani nalunaarutigisinnaavaat, ilinniarnertik imaluunniit ilinniarnermik ilaa nammineerluni ilinniarnertut ingerlakkumallugu, tamannalu ima paasineqassaaq, ilinniartoq ilinniarnertuunngorniartimmi tamakkiisumik ilaannakortumilluunniit ilinniartuunngikkaluarluni ilinniakkami pineqartumi misilitsinnissamut nalunaartoq. Naalakkersuisut nammineerlutik ilinniartut pillugit malittarisassanik erseqqinnerusunik aalajangersaasinnaapput.

*Imm. 3.* Rektorip ilinniartut takkutinnitsoortarnerat akuleruffigissallugu pisussaaffigaa. Tamanna pillugu aalajangersakkat ilinniarnertuunngorniartuup ilinniarnermut ileqqorissaarnissamullu malittarisassaani aalajangersarneqassapput, tak. § 55.

**§ 55.** Rektorip ilinniarnertuunngorniartuup ilinniarnermut ileqqorissaarnissamullu malittarisassai aalajangersassavai, taamaattoq tak. imm. 3. Rektorip ilinniarnermut ileqqorissaarnissamullu malittarisassat pillugit ilinniartut ilisimatissavai. Rektorip ilinniartuup ilinniarnermut ileqqorissaarnissamullu malittarisassai Naalakkersuisunut ilisimatitsissutitut nassiutissavai.

*Imm. 2.* Ilinniartunut ilinniarnermut ileqqorissaarnissamullu malittarisassanik maleruaanngitsunut iliuuserisassat pillugit rektori aalajangiissaaq. Ilinniartut arlaleriarlutik imaluunniit sakkortuumik ilinniartuup ilinniarnermut ileqqorissaarnissamullu malittarisassanik unioqqutitsisut, rektorip ilinniartuup anisissinnaavai.

*Imm. 3.* Naalakkersuisut ilinniarnermut ileqqorissaarnissamullu malittarisassat pillugit malittarisassanik erseqqinnerusunik aalajangersaassapput, tamatumunnga ilanngullugit pinngitsoorani takkuttussaataaneq atuunngitsoortarnerillu pillugit aamma ilinniartunut ilinniarnermut ileqqorissaarnissamullu malittarisassanik malinninngitsunut iliuuseqarneq.

## **Kapitali 6**

### *Ilinniartitsisut*

**§ 56.** Ilinniartitsisut pisussaaffigaat ilinniartut ataasiakkaat ilinniakkamikkut pissarsinissaat sulissutigissallugu taamatullu ilinniartut ataasiakkaat klassillu toqqissisimasumik atugaqarnissaat. Ilinniartitsisut pisussaaffigaat ilinniarnermi avatangiisit toqqissisimasut kajumissuseqalernartullu, inuit ataasiakkaat kulturikkut inooqatigiissutsikkullu tunuliaqutaannik ataqqinninnermik akaareqatigiinnermillu ersiuteqarfiusut pilersinnissaat.

**§ 57.** Ilinniartitsisut inatsit manna naapertorlugu ilinniartitsisut, ilinniarnertuunngorniartuup ilinniartitsissummi ataatsimi amerlanerniluunniit ilinniartitsinissamut piginnaaneqassapput, taamaattoq tak. imm. 2 aamma 3 aamma § 77. Ilinniartitsinermik piginnaasaqarnermut ilaapput ilinniartitsissutitigut, tak. § 58, perorsaanikkullu piginnaasaqarneq, tak. § 59.

*Imm. 2.* Suliamik ingerlatsinermi perorsaanermillu piginnaasat pillugit Naalakkersuisut annertunerusumik malittarisassiorsinnaapput, tassunga ilanngullugit suliamik ingerlatsinermi minnerpaamik piumasaqaatit pillugit aamma §§ 58-59-imi piumasaqaatit aalajangersakkat saneqqussinnaaneranut periarfissat pillugit.

*Imm. 3.* Naalakkersuisut malittarisassiuussinnaavaat piumasaqaatit suut naapertorlugit inuit ilinniartitsinermik piginnaasaqanngitsut piffissami killilimmi ilinniarnertuunngorniartuup ilinniartitsisinnaassanersut.

**§ 58.** Ilinniartitsinermik piginnaasaqarnissamut piumasaqaataavoq universitetimi ilinniartitsissutit qaffasinnerusumi allami kandidatitut soraarummeersimanissaq ilinniartitsissutit ilinniarnertuunngorniartuup ilinniartitsissutigisartagaani ataatsimi amerlanerniluunniit, immikkut ilinniagaq ilanngullugu, taamaattoq tak. imm. 2. Ilinniartitsissutit marluk akuleriisillugit ilinniakkami ilinniartitsissutit tamarmik ilinniarnertuunngorniartuup ilinniartitsissutigisartagaanut ilaassapput. Aammattaaq piumasaavoq, ilinniagaq immikkuualuttortamigut ataatsimoortumillu isigalugu ilinniartitsissummut periutsinullu tunngatillugu ima atitussuseqarlunilu itissuseqassasoq, ilinniartitsisoq illersorneqarsinnaasumik ilinniartitsissummi ilinniartitsisinnaalluni – ilinniarnertuunngorniartuup ilinniakkap anguniagaanut naleqqiullugu.

*Imm. 2.* Ilinniakkamut naleqqiullugu piginnaasaqassuseq aammattaaq ilinniagaq alla aqqutigalugu pissarsiarineqarsinnaavoq, malitsigisaanik suliamut tunngatillugu piginnaaneqalissutaasumik naapertuuttumik inuutissarsiummik ingerlatsisimanermik tapertaqarsinnaasumik.

*Imm. 3.* Ilinniartitsisut, ilinniartitsissutini inuutissarsiummut sammisuni ilinniartitsisuusut, inuutissarsiummik misilittagaqassapput.

*Imm. 4.* Rektorip ilinniartitsisut ilinniarnertuunngorniarfimmi atorfinniinneranni ilinniartitsissutini piginnaasaqartutut akuerissavai.

**§ 59.** Perorsaanikkut piginnaasaqarneq anguneqassaaq pædagogikummip naammassineratigut, taanna tassaavoq ilinniartitsisunut atorfinerlaanut perorsaanikkut ilinniagaq. Pædagogikum atuagarsornertaqarlunilu ilinniartitsinertaqarpoq, tamatumanilu ilaallunissaaq ilinniarnertuunngorniarfimmi klassini ilinniartitsineq.

*Imm. 2.* Ilinniartitsisut pædagogikummip naammassineratigut ilinniartitsinermik pisinnaasaqalissapput, ilinniarnertuunngorniarfimmi ilinniakkap ilusaa aamma ilinniarnertuunngorniarfiup aaqqissugaanera paasisaqarfīgissallugit, ilinniartitseriaatsit atuagarsornikkut ilisimasaqarfīgissallugit, kiisalu ilinniakkap inuiaqatigiinnut avatangiiserisanut ataqatigiinnera paasisaqarfīgissallugu.

*Imm. 3.* Pædagogikum ilinniarnertuunngorniarfimmi aalajangersimasumik atorfeqalernermit siullermiit ukiut siulliit marluk ingerlaneranni naammassineqassaaq. Immikkut inuttut peqqutissaqartillugu imaluunniit ilinniarfiup isumassornissaanut pingaartuteqarpat rektorip akuerisinnaavaa pædagogikummip ilinniarnertuunngorniarfimmi atorfininnerup siulliup kingorna ukiut pingasut tikillugit kinguartinissaa.

*Imm. 4.* Naalakkersuisut pædagogikummut atatillugu pikkorissarnerit misilitsinnerillu akisussaaffigaat.

**§ 60.** Naalakkersuisut ilinniartitsinikkut piginnaasaqarlernermit uppersaasat suliarissavaat.

*Imm. 2.* Naalakkersuisut tamanna pillugu qinnuteqartoqareerneratigut ilinniartitsisoq nunanit allaneersoq ilinniartitsinissamut piginnaanilersinnaavaat, ilinniartitsisoq nunami pineqartumi assingusumik ilinniartitsisutut piginnaaneqarpat.

**§ 61.** Ilinniartitsisut ilisimatusarnermik tunngaveqartunik ilinniaqqinnissamik neqeroorutit peqataaffiginissaat pisinnaatitaaffigalugillu pisussaaffigaat.

## Kapitali 7

### Rektori

**§ 62.** Rektori tassaavoq ilinniarnertuunngorniarfiup ulluinnarni aqutsisua, perorsaanikkut allaffissornikkullu suliasanik ilinniarfiup sulisuinut naleqqiullugu aqutsillunilu agguaaassisartoq. Ilinniarfinni akuerisaasuni rektorip suliasai ilinniarfiup pisortaanit imaluunniit ilinniarnertuunngorniarnermut akisussaasussatut pisortatut atorfinitsitaasumit isumagineqassapput. Rektori aamma pisortaq naggatit aappaanni eqqaaneqartoq inatsimmi matumani rektorimik taaneqarput.

*Imm. 2.* Ilinniarnertuunngorniarfinni rektori Naalakkersuisunit atorfinitsinneqarlunilu soraarsinneqassaaq. Ilinniarfinni akuerisaasuni ilinniarnertuunngorniarnermut akisussaalluni pisortaq, tak. imm. 1, naggatit aappaat, malittarisassat ilinniarfimmuut atuuttut naapertorlugit atorfinitsinneqarlunilu soraarsinneqartassaaq.



*Imm. 3.* Ilinniarnertuunngorniarfinni rektori ilinniarnertuunngorniarfiup ilinniartitsineranut, misilitsinnernut soraarummeernernullu tunngatillugu ilinniakkatigut, perorsaanikkut allaffissornikkullu Naalakkersuisunut akisussaavoq. Ilinniarmiit akuerisaasut assingusumik akisussaaffeqarput, malittarisassat ilinniarmmut atuuttut naapertorlugit.

*Imm. 4.* Ilinniarnertuunngorniarfinni ilinniartitsisut sulisullu allat rektorimit atorfinitsinneqarlutillu soraarsinneqassapput. Ilinniarmut akuerisaasuni ilinniartitsisut sulisullu allat malittarisassat ilinniarmmut atuuttut naapertorlugit atorfinitsinneqarlutillu soraarsinneqartassapput.

*Imm. 5.* Rektorip ilinniarmut ilinniartui pillugit aalajangigassat aalajangersimasut tamaasa aalajangiiffigisassavai, inatsit manna imaluunniit inatsit manna naapertorlugu malittarisassat aalajangiunneqartut allatut piumasaqaateqanngippata.

**§ 63.** Rektor, taamaattoq tak. § 78, aqutsinermik aamma ilinniarnertuunngorniarfiup ilinniartitsissutaani minnerpaamik ataatsimi ilinniartitsinikkut piginnaasaqassaaq, tak. § 58 aamma ilinniartitsinikkut piginnaasaqassalluni, tak. § 59.

**§ 64.** Rektorip ilisimatusarnermik tunngaveqartunik ilinniaqqinnissamik neqeroorutit peqataaffiginissaat pisinnaatitaaffigalugillu pisussaaffigaa.

## **Kapitali 8**

### *Siunnersuisutut ingerlataqartut*

**§ 65.** Ilinniarnertuunngorniarfinni ataasiakkaani tamani ilinniartitsisut siunnersuisartoqatigiiliussapput, tassani inuttaassallutik rektori, immikkoortortani pisortat kiisalu ilinniartitsisut, ilinniarnertuunngorniarfimi atuartitsisartut imaluunniit atuartitsinermut ilinniartitsinermulluunniit arlaatigut attuumassuteqartut. Ilinniartut siunnersuisartoqatigiivisa peqataatitaat ilinniartitsisut siunnersuisartoqatigiivisa ataatsimiinnerini malinnaasutut peqataasinnaavoq.

*Imm. 2.* Ilinniartitsisut siunnersuisoqatigiit rektorimut siunnersuisassapput.

*Imm. 3.* Ilinniartitsisunut siunnersuisoqatigiit ukiumut ikinnerpaamik sisamariarlutik ataatsimiittassapput. Ilinniartitsisut siunnersuisartoqatigiivisa namminneq suleriaasissartik aalajangissavaat. Inaarutaasumik suleriaasissaq rektorimit akuersissutigineqassaaq.

*Imm. 4.* Ilinniartitsisunut siunnersuisartoqatigiit aprilimi ukiut tamaasa siulittaasussaminnik qinersisassapput.

*Imm. 5.* Ilinniartitsisunut siunnersuisoqatigiinni apeqqutit sorliit qaqineqassanersut rektorip ilinniartitsisunullu siunnersuisoqatigiinni siulittaasorlu ataatsimoorlutik aalajangertassavaat.

*Imm. 6.* Ilinniartitsisut siunnersuisartoqatigiivini sulineq piffissamut ilinniartitsisup ilinniartitsiffianut ilaasutut naatsorsuunneqarpoq. Sulineq ima aaqqissuuneqassaaq, ilinniartitsisoq sapinngisamik annertunerpaamik ilinniartitsinermik pilersarusiorikkamik ingerlatsisinnaatillugu.

*Imm. 7.* Naalakkersuisut ilinniartitsisut siunnersuisartoqatigiivi pillugit malittarisassanik erseqqinnerusunik aalajangersaasinnaapput, tamatumunnga ilanngullugit ilinniartitsisut siunnersuisartoqatigiivinut qinersisarneq, siunnersuisartoqatigiit sulinerat piffissarlu atuuffiat.

**§ 66.** Ilinniarnertuunngorniarfinni ataasiakkaani tamani ilinniartut ilinniartut siunnersuisartoqatigiviinik pilersitsissapput, ilinniartut pillugit pissutsini tamani rektorimut siunnersuisartussanik.

*Imm. 2.* Ilinniartut siunnersuisartoqatigiivi tassaapput ilinniartut peqataatitaannik inuttaqartut, ilinniarfimmi ilinniartunit taakkualu akornannit toqqakkat. Ilinniartitsisut siunnersuisartoqatigiivisa peqataatitaat ilinniartut siunnersuisartoqatigiivisa ataatsimiinnerini malinnaasutut peqataasinnaavoq.

*Imm. 3.* Ilinniartut siunnersuisartoqatigiivisa suleriaasissartik namminneq aalajangissavaat.

*Imm. 4.* Ilinniartut siunnersuisartoqatigiivini sulineq akissarsiaqaataanngilaq.

*Imm. 5.* Ilinniartut siunnersuisartoqatigiivini sulineq ima aaqquissuuneqassaaq, ilinniartuq sapinngisamik annertunarpaamik ilinniartitsinermik pilersaaruseriikkamik ingerlatsisinnaatillugu. Ilinniartut siunnersuisartoqatigiivini sulineq qaqutigoortumik ilinniartitsinerup pilersaaruseriikkap avataani pisinnaatinnagu, ilinniartut siunnersuisoqatigiivini sulineq ilinniartitsinerup ilaatut isigineqassaaq.

*Imm. 6.* Naalakkersuisut ilinniartut siunnersuisartoqatigiivi pillugit malittarisassanik erseqqinnerusunik aalajangersaasinnaapput, tamatumunnga ilanngullugit ilinniartut siunnersuisartoqatigiivinut qinersineq, ilinniartut siunnersuisartoqatigiivisa sulinerat atuuffiallu.

## Kapitali 9

### *Nakkutilliineq, pitsaassutsimik inerisaaneq naammagittaalliornerlu*

**§ 67.** Naalakkersuisut ilinniartitsineq, misilitsinnerit soraarummeernerillu inatsit manna naapertorlugu ingerlanneqartut qullersaaffigalugit akisussaaffigaat nakkutigisarlugillu.

*Imm. 2.* Naalakkersuisut qularnaassavaat ilinniarnertuunngorniarfinni tamani ilinniakkamut ilinniartitsinermullu atatillugu ingerlaavartumik pitsaassutsimik inerisaasoqarnissaa, tamannalu qularnaarumallugu avataaniit naliliinermik aallartitsisinnaallutik.

*Imm. 3.* Naalakkersuisut suliaassanut perorsaanerumut ingerlatsinermullu tunngasunut atatillugu rektori peqqussummik tunisinnaavaat. Rektorilinniarfimmi akuerisaasumi atorfeqarpat peqqussut ilinniarfuup pisortaanut tunniunneqassaaq.

**§ 68.** Naalakkersuisut ilinniakkat, ilinniartut sulisullu pillugit paasissutissat pisariaqartut tamaasa ilinniarnertuunngorniarfinnit piniarsinnaavaat, tamatumunnga ilanngullugit ilinniarnertuunngorniarfiit alakkarnissaannik isumaginninneq nakkutilliinissaq aamma kisitsisitigut paasissutissanik suliaqarnissaaq siunertarlugu, tamannalu pillugu malittarisassanik erseqqinnerusunik aalajangersaasinnaallutik.

*Imm. 2.* Ilinniarnertuunngorniarfiit Naalakkersuisullu akornanni elektroniskiusumik attaveqatigiinneq pillugu malittarisassanik Naalakkersuisut aalajangersaasinnaapput, tamatumunnga ilanngullugit paasissutissanik tunniussinermi ilusissaat qanorlu ittuunissaat. Aammattaaq Naalakkersuisut nakkutilliinissamut isumannaallisaanissamullu piumasaqaatinik aalajangersaasinnaapput.

**§ 69.** Ilinniartuq aamma ilinniarnertuunngorniarumalluni qinnuteqartoq rektorip aalajangiineri pillugit, aalajangiinerup ilinniartumut qinnuteqartumulluunniit nalunaarutigineqarneraniit sap. ak. 2 qaangiutsinnagit, Naalakkersuisunut naammagittaalluteqarsinnaavoq. Naalakkersuisut tamanna pillugu malittarisassanik erseqqinnerusunik aalajangersaassapput.

*Imm. 2.* Ilinniartuq qinnuteqartorluunniit angajoqqaatut oqartussaasuuffigineqarpat, aammattaaq angajoqqaatut oqartussaaffimmik piginnittoq naammagittaalliorsinnaavoq.

## Kapitali 10

### *Tapersiissutaasumik sammisassat*

**§ 70.** Naalakkersuisut pisussaaffigaat isumagissallugit:

- 1) Ilinniarnertuunngorniarneq pillugu paasissutissat ilitersuutillu.
- 2) Ilinniakkanut atatillugu siunnersorteqarneq.
- 3) Ilinniartitsinermit atortunik inerisaaneq.
- 4) Ilinniarnertuunngorniarneq ilinniartitsisunut pisortanullu pikkorissarnissamik ilinniaqqinnissamillu neqerooruteqarneq.
- 5) Perorsaanikkut ilisimatusarneq inerisaanerlu, kiisalu ilinniarnertuunngorniarneq ingerlatsineranik naliliineq.
- 6) Misilitsinnerit soraarummeernerillu aaqqissuunnerat.

## Kapitali 11

### *Aningaasalersuineq atuisullu akiliutaat*

**§ 71.** Ilinniarnertuunngorniarneq sanaartugaataanut, ilinniartitsinermit ingerlatsinernullu aningaasartuutit tamaasa Namminersorlutik Oqartussat pisussaaffigaat, erseqqissumik inatsisitigut tungaviligaanngippat, aningaasartuutit tamarmik ilaannaalluunniit allanit pisussaaffigineqartut.

**§ 72.** Ilinniarnertuunngorniarneq ilinniarneq akeqanngilaq, taamaattoq tak. imm. 2-7. Ilinniartitsinermit atortut ilinniartitsinermit pisariaqartut iliniartunut akeqanngitsumik atugassanngortinneqassapput, taamaattoq tak. imm. 6.

*Imm. 2.* Ilinniartut ilinniarnermi takusassarsiornerit, paasisassarsiorluni angalanerit il.il., ilinniarnermut ilaasunut, peqataanerminnut akileeqquneqarsinnaapput (atuisut akiliutaat). Taamaattoq ilinniartitsinermit imaluunniit ilinniartitsisut peqataaneranni aningaasartuutitut akileeqqusisoqarsinnaanngilaq. Akiliunneqarluni angalanertut iluseqartumik akikillisaanneqarnerit peqataasunut tamanut iluaqutaassapput.

*Imm. 3.* Ilinniarnermi takusassarsiornerit, paasisassarsiorluni angalanerit il.il. peqataasut nerisaqarnerinnarmut akileeqataaffigisaat, annerpaamillu ullut-unnuallu aallartittut tamaasa 50 kr-mik akeqartinneqartut, pinngitsoorani takkuttussaataitaanermut malittarisassanut ilaapput, tak. §§ 54-55. Ilinniartoq atuisutut akiliisimannginnini pissutigalugu tamatumunnga peqataanngitsoortinneqarsinnaanngilaq.

*Imm. 4.* Ilinniarnermi takusassarsiornerit, paasisassarsiorluni angalanerit il.il. nerisaqarnerinnaanngitsumut imaluunniit ullut-unnuallu aallartittut tamaasa 50 kr. sinnerlugu peqataasunit akiliiffusut, ilinniartut ataasiakkaat namminneq piumassutsimikkut peqataaffigissavaat, ilinniarnertuunngorniarneq ilinniartunut peqataanngitsunut allatut aaqqissuussilluni ilinniartitsinissamik neqerooruteqassaaq.

*Imm. 5.* Ilinniartut § 36 naapertorlugu immikkut aaqqissuussinermit ilaasut, nunami allamiinnermut pineqartumut atatillugu nammineq angalanerminnut, namminneq najugaqarnerminnut nerisaqarnerminnullu akileeqquneqarsinnaapput. Ilinniartitsinermit imaluunniit ilinniartitsisut

peqataaneranni aningaasartuutitut ilinniartut akileeqquneqarsinnaanngillat. Naalakkersuisut ilinniartut nunani allaniinnerannut akiliutissap annertunerpaaffissaa pillugu aalajangersaasinnaapput.

*Imm. 6.* Naalakkersuisut ilinniartut killilimmik namminneerlutik ilinniartitsinermit atortussanik piniarnissaat pillugu malittarisassanik aalajangersaasinnaapput.

*Imm. 7.* Ilinniartut ilinniartitsissutinik ataasiakkaanik ilinniartitsinermit peqataasut qaqugukkut ilinniartitsinermit peqataanerminnut misilitsinnernullu peqataanerminnut akiliisarnissaat pillugu aamma ilinniartut ilinniartitsinermit nalunaaqqanngikkaluarlutik (namminneq ilinniartut) misilitsinnerminnut akiliuteqarnissaat pillugu Naalakkersuisut malittarisassanik aalajangersaasinnaapput.

## **Kapitali 12**

### *Misileraalluni inerisaallunilu suliat*

**§ 73.** Naalakkersuisut immikkut pisoqartillugu inatsit sanioqqussinnaavaat, tamanna misileraalluni sulinissap perorsaanikkullu inerisaanissap siuarsarnissaanik peqquteqarpat. Piumasaqaataavoq misileraalluni sulinerup inerisaanerullu ilinniartut ilinniarnertuutut ilinniakkamik ingerlaqqiffiusumik ilinniarnermut tunngavissatut atornissaanut periarfissaat allatigulluunniit pisinnaatitaaffii ajornerulersissanngikkaat.

*Imm. 2.* Naalakkersuisut ilinniartunut ataasiakkaanut tunngatillugu inatsit sanioqqussinnaavaat, immikkorluinnaq ittunik pissutissaqartillugu.

## **Kapitali 13**

### *Atuuttuulersitsinermit ikaarsaariarnermilu aalajangersakkat*

**§ 74.** Inatsit atuuttuulissaaq 1. august 2012, taamaattoq tak. imm. 3.

*Imm. 2.* Inatsit atuuppoq ilinniartunut 1. august 2012 kingusinnerusukkulluunniit ilinnialersunut.

*Imm. 3.* Inatsimmi kapitali 2 ilinniartunngortitsinermit tunngasoq atuutilissaaq 1. januar 2012.

**§ 75.** Inatsisip atuuttuulerneratigut malittarisassat Namminersorlutik Oqartussanut atatillugu pissutsit assigiinngitsut pillugit inatsit nr. 474, 12. juni 2009-meersukkut atuutsinneqartut atorunnaarsinneqarput.

**§ 76.** Ilinniartut Kalaallit Nunaanni Ilinniarnertuunngorniarmimmi imaluunniit ilinniarnertuunngorniarmimmi inuutissarsiummut sammisuni ilinniarnertuutut inatsisip atuuttuulinnginnerani ilinniartuusut, 2014-imi aasakkut soraarummeernissaq ilanngullugu, napparsimalluni soraarummeernerit ilanngullugit, malittarisassat maannamut atuuttut Kalaallit Nunaanni Ilinniarnertuunngorniartarnerit pillugit Kunngip peqqussutaani nr. 108-mi, 17. februar 1992-meersumi aamma Kalaallit Nunaanni inuutissarsiutitigut ilinniarnertuunngorniarmifit pillugit inatsisip Kalaallit Nunaanni atuuttuulersinnissaat pillugu Kunngip peqqussutaani nr. 787-mi, 20. juni 2006-meersumi, kiisalu malittarisassani taakku tunngavigalugit suliaasuni, imaluunniit aalajangersakkat taakku tunngavigalugit atuutsinneqartut naapertorlugit, HHX-imi aamma HTX-imi soraarummeernissamut innersuunneqarsinnaapput. Misilitsinnerit soraarummeernerillu aalajangersakkat maannamut atuuttut naapertorlugit ingerlanneqartassapput. Ilinniarnermut pissuserissaarnissamullu malittarisassat rektorip inatsimmi matumani § 55 naapertorlugu aalajangigai, atuutsinneqassapput takkutinngitsoornermit klassimullu qaffasinnerusumut nuunnissamut

malittarisassat kisiisa pinnagit.

*Imm. 2.* Ilinniartunut imm. 1-imi taaneqartunut, aallartinnermilu ingerlatsinernik pilersaarutaasunik malinnaasunut, ilinniartitsineq 2014-imi aasap tungaanut malittarisassat maannamut atuuttut naapertorlugit ingerlanneqassaaq.

*Imm. 3.* Naalakkersuisut immikkut pisoqartillugu ilinniarnertuunngorniarfiit pisinnaatissinnaavaat, soraarummeernermet uppersaasiornissamut, misilitsinnernik inatsit manna malittarisassallu maannamut atuuttut naapertorlugit imaqartunik.

**§ 77.** Ilinniartitsisut inatsisip atuutilernissaa sioqqullugu atorfeqartut, piginnaasariaqartutigut piumasaqaataasut inatsisip atuuttuulernissaata tungaanut atuuttut, piviusunngortissinnaasariaqarpaat.

**§ 78.** Rektorit, tak. § 62, imm. 1, naggat kingulleq, inatsisip atuutilernissaa sioqqullugu atorfeqartut, piginnaasariaqartutigut piumasaqaataasut inatsisip atuuttuulernissaata tungaanut atuuttut, piviusunngortissinnaasariaqarpaat.

---

Inatsisartut inatsisaat nr. 4, 30. maj 2014-imeersoq (ilinniarnertuunngorniarfimmil ilinniartitsissutini ataasiakkaanik ilinniartitsineq, ilinniarnissamut piareersarluni pikkorissarnerit, ilinniartitsissutitut minnerpaamik piumasaqaatit il.il.)<sup>[i]</sup> atuutilernissaanut aalajangersakkamik matuminnga imaqarpoq:

## § 2

Inatsisartut inatsisaat 1. juni 2014 atuutilersinneqarpoq.

---

Inatsisartut inatsisaat nr. 31, 9. december 2015-imeersoq (Atorfnitsitsinermut soraarsitsinermullu pisinnaatitsinerit)<sup>[ii]</sup> atuutilernissaanut aalajangersakkamik matuminnga imaqarpoq:

## § 2

Inatsisartut inatsisaat 1. januar 2016 atuutilissaaq.

---

Inatsisartut inatsisaat nr. 16, 27. november 2020-meersoq (Ilinniartussanik tiguisarneq pillugu suleriaatsimik allanngineq, semesterimut siullermut tunngaviumik ingerlatsinermik allanngineq, ilinniartitsisunut siunnersuisoqatigiit pillugit malittarisassat nutaat il.il.)<sup>[iii]</sup> atuutilernissaanut aalajangersakkamik matuminnga imaqarpoq:

## § 2

Inatsisartut inatsisaat ulloq 1. januar 2021 atortuulissaaq. Aalajangersakkat § 1, nr. 6, 8, 9, 10, 11 aamma 14 atortuulissapput ulloq 1. august 2021.

---

*Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik, ulloq 29. september 2021*

Karsten Peter Jensen  
Pisortaq

/ Claus Kleemann

- [\[i\]](#) Inatsimmi allannguutit pineqarput § 1, imm. 5 aamma 6, § 1a aamma § 57, imm. 2.
- [\[ii\]](#) Inatsimmi allannguut pineqarpoq § 62, imm. 4, oqaaseqatigiit siulliit.
- [\[iii\]](#) Inatsimmi allannguutit pineqarput Sumi tamani inatsimmi allanngortinneqarpoq, § 1, imm. 1, oqaaseqatigiit aappaat, § 5, imm. 1, § 8, imm. 1, nr. 3, § 8, imm. 2, § 9, § 11, § 15, imm. 1, § 16, imm. 2 aamma 4, § 19, § 20, imm. 2 § 23, § 28 kiisalu § 65.

**Namminersorlutik Oqartussat**  
Imaneq 4  
3900 Nuuk  
E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut

